

四庫全書

集部

欽定四庫全書

顏魯公集卷十二

唐 顏真卿 撰

序

尚書刑部侍郎贈尚書右僕射孫遜文公集序

古之為文者所以導達心志發揮性靈本乎詠歌終乎
雅頌帝庸作而君臣動色王澤竭而風化不行政之興
衰實繫于此然而文勝質則綉其鞶帨而血流漂杵質

勝文則野於禮樂而木訥不華歷代相因莫能適中故
詩人之賦麗以則詞人之賦麗以淫此其效也漢魏已
還雅道微缺梁陳斯降宮體聿興既馳騁於末流遂受
嗤於後學是以沈隱侯之論謝康樂也乃云靈均已來
此未及覩盧黃門之序陳拾遺也乃云道喪五百歲而
得陳君若激昂顏波雖無害於過正權其中論不亦傷
於厚誣何則雅鄭在人理亂由俗桑間濮上胡為乎綿
古之時正始皇風奚獨乎凡今之代蓋不然矣其或斌

斌彪炳郁郁相宣膺期運以挺生奄寰瀛而首出者其
惟僕射孫公乎公諱逖河南鞏人其先自樂安武水寓
于涉而從焉父嘉之以詞學登科官至宋州司馬公風
裁徵明天才傑出學窮百氏不好非聖之書文統三變
特深稽古之道故逸氣上躋而高情四達羌索隱乎混
元之始表獨立於常均之外不其盛歟年數歲即好屬
文十五時相國齊公崔日用試土火爐賦公雅思道麗
援翰立成齊公駭之約以忘年之契爾後遂有大名故

其試言也年未弱冠而三擅甲科吏部侍郎王丘試竹
簾賦降階約拜以殊禮待之相國燕公張說覽其策而
心醉其序事也則伯樂川記及諸碑誌皆卓立千古傳
於域中其為詩也必有逸韻佳對冠絕當時布在人口
其詞言也則宰相張九齡欲掎摭疵瑕沈吟久之不能
易一字公之除庶子也苑咸草詔曰西掖掌論朝推無
對議者以為知言凡斯夥多庸可悉數故燕國深賞公
才俾與張九齡許景先韋述同遊門庭命子均埴施伯

仲之禮江夏李邕自陳州入計繕寫其集齋以詣公託
知己之分其為先達所重也如此公文雅有清鑒典考
功時精覈進士雖權要不能逼所獎擢者二十七人數
年間宏詞判等入甲者一十六人授校書者九人其餘
咸著名當世已而多至顯官明年典舉亦如之故言第
者必稱孫公而已夫然信可謂人文之宗師國風之哲
匠者矣公凡所著詩歌賦序策問贊碑志表疏制誥等
不可勝紀遭二朝之亂多有散落子宿絳成等夙奉過

庭之訓咸以文章知名同時臺省乃編次公文集為二十卷列之于左庶乎好事者傳寫諷誦以垂乎無窮亦何必藏名山而納石室也真卿昔觀光乎天府實荷公之獎擢見命為序豈究端倪時則永泰元年仲秋之月至若世系闕閱蓋存諸別傳此不復云

懷素上人草書歌序

開士懷素僧中之英氣概通疎性靈豁暢精心草聖積有歲時江嶺之間其名大著故吏部尚書韋公陟觀其

筆力勗以有成今禮部侍郎張公謂賞其不羈引共遊
處兼好事者同作歌以贊之動盈卷軸夫草藁之作起
於漢代杜慶崔瑗始以妙聞迨乎伯英尤擅其美義獻
茲降虞陸相承口訣手授以至于吳郡張旭長史雖恣
性顛逸超絕古今而楷法精詳特為真正某早歲嘗接
游居屢蒙激勸教以筆法資質劣弱又嬰物務不能懇
習迄用無成追思一言何可復得忽見師作縱橫不羣
迅疾駭人若還舊觀向使師得親承善誘亟揖規模則

入室之賓舍子奚適嗟嘆不足聊書以冠諸篇首

送劉太冲序

劉太冲彭城之華望者也自開府垂明於宋室澤州考績於國朝道素相承世傳儒雅尚矣夫其果行修潔斯文彪蔚鄂木照乎移華龍驤乎雲路則公山正禮策高足於前冲與太真嗣家聲於後有日矣昔余作郡平原拒胡羯而請與從事掌銓吏部第甲乙而超升等夷爾來蹉跎猶屑卑位雖才不偶命而德其無隣故冲之

西遊斯有望矣江月弦魄秦淮頂潮君行句溪正及春
水勗哉之子道在何居

送辛子序

醇白之士曰隴西辛晃銳業班漢額門名家十五而志
學克明五十而勵精益懋拳拳不失慕回也之服膺袞
袞可聽同茂先之善說昔我高叔祖鄆州使君著決疑
一十二卷問答稱為大顏曾伯祖祕書監府君集註解
成一十二帙闕儒斟酌煩省摭撫英華勒成三十篇名

之曰漢畧夫其發凡舉例晁序言之已詳惜乎困於縑
緗不獲繕寫遂使精義沈鬱闇然未彰吁足嘆也二月
初吉金陵氣暖抵淮上之諸侯所如必合及滁川之美
景未至方歡羣子賦詩以寵之

顏魯公集卷十二

欽定四庫全書

顏魯公集卷十三

唐 顏真卿 撰

記

東方先生畫贊碑陰記

東方先生畫贊者晉散騎常侍夏侯湛之所作也湛字
孝若父莊為樂陵太守因來覲省遂作斯文贊云大夫
諱朔字曼倩平原馱次人魏建安中分馱次為樂陵郡

又為郡人馬馱次今移屬樂安郡東去祠廟二百里故
馱次城今在平原郡安德縣東北二十二里廟西南一
里先生形像今則捏素為之并二細君侍焉郡嘗為德
州其贊開元八年刺史韓公思復刻于石碑真卿去歲
拜此郡屬殿中侍御史平公列監察御史閻公寬李公
史魚右金吾曹公謨咸以河北採訪使東平王判官
巡巡按押至真卿候于境上而先生祠廟不遠道周亟
與數公暨家兄淄州司馬曜卿長史前洛陽蕭晉用前

醴泉尉李伯魚徵君左驍衛兵曹張璵麟遊尉韋宅相
朝城主簿韋夏有司經正字畢耀族弟渾前叅軍鄭悟
初同茲謁拜退而遊于中唐則韓之刻石存焉僉嘆其
文字纖靡駁癖生金四十年間已不可識真卿於是勒
諸他山之石蓋取其字大可久不復課其工拙故援翰
而不辭焉至若先生事跡則載在太史公書漢書風俗
通武帝內傳十洲記列仙神仙高士傳此不復紀焉有
唐天寶十三載季冬辛卯朔建

鮮于氏離堆記

卷十三

閬州之東百餘里有縣曰新政新政之南數千步有山曰離堆斗入嘉陵江直上數百尺形勝縮矗歆壁峻肅上崢嶸而下迴湫不與衆山相連屬是之謂離堆東面有石堂焉即故京兆尹鮮于君之所開鑿也堂有室廣輪袤丈蕭豁洞敞虛聞江聲徹見人羣象人村川壘若指諸掌堂北磐石之上有九曲流杯池焉懸源螭腹蹙噴鶴味醲渠股引迥坐環溜若有良朋以傾醇酎堂南

有茅齋焉遊於斯息於斯聚賓友於斯虛而來者實而
歸其齋壁間有詩焉皆君舅著作郎嚴從君甥殿中侍
御史嚴旉之等美君考槃之所作也其右有小石廬焉
亦可蔭而跋據矣其松竹桂栢冬青雜樹皆徙他山而
栽蒔焉其上方有男宮觀焉署之曰景福君弟京兆尹
叔明至德一年十月嘗在尚書司勳員外郎之所奉置
也君諱向字仲通以字行漁陽人卓爾堅忮毅然抗直
易有之曰篤實輝光書不云乎沈潛剛克君自高曾已

降世以財雄招徠賢豪施舍不倦至君繼序其流益光
弱冠以任俠自喜尚未知名乃慷慨發憤於焉卜築養
蒙學文忘寢與食不四三載展也大成著作奇之勗以
賓薦無何以進士高第驟登臺省天寶九載以益州大
都督府長史兼御史中丞持節劔南節度副大使知節
度事劔南山南西道採訪處置使入為司農少卿遂作
京兆尹以忤楊國忠貶邵陽郡司馬十有二載秋八月
除漢陽郡太守冬十有一月終於所任官舍悲夫雄圖

未伸志業已空塋于縣北表附先塋禮也君之薨也冢
子光祿寺丞昱匍匐迎喪星言泣血自沔沔峽湍險萬
重肩槁足跼板筴引舳凡今幾年跋涉在目因心則至
豈無僮僕洎昱之季曰尚書都官員外郎吳克篤前烈
永言孝思懇懇一志反塋于茲行道之人孰不跋而真
卿猶子曰紘從父兄故偃師丞春卿之子也嘗尉閭中
君故舊不遺與之有忘年之契叔明昱亦篤世親之
歡真卿因之又忝憲司之察亟與濟南蹇昂奉以周旋

益著通家之好君兄允南以司膳司封二郎中弟允臧
以三院御史偕與叔明首末聯事我是用飽君之故乾
元改號上元之歲秋八月哉生魄猥自刑部侍郎以言
事忤旨聖恩全宥貶貳于蓬州沿嘉陵而路出新政適
會昱以成都兵曹取急歸覲遭我乎貴州之朝留遊締
歡信宿陁峴感今懷昔遂援翰而志之叔明時刺商州
吳又申掾京兆不同躋陟有限如何帝唐龍集後壬寅
仲夏己卯朔十五日甲午刻于門序之左右

撫州寶應寺律藏院戒壇記

如來以身口意三業難調伏也淨尸羅以息其內行住
坐卧四威儀攝善心也明布薩以昭其外故曰波羅提
木叉是汝之師則憍陳如之善來迦葉波之尚法諸聲
聞三歸約衆十四年以八敬度尼羯磨相承其致一也
至漢靈帝建寧元年有北天竺五喪門支法領等始於
長安譯出四分戒本兼羯磨與大僧受戒至曹魏有天
竺十尼自遠而來為尼受其後秦姚萇弘始十一年有

梵僧佛佗耶舍譯出四分律本而關內先行僧祇江南
盛行十誦至魏法聰律師始聞四分之宗聰傳道覆覆
傳慧光光傳雲輝願願傳理隱樂洪雲雲傳遵遵傳智首
首傳道宣宣傳洪洪傳法勵勵傳滿意意傳法成成傳
大亮道賓亮亮傳雲一賓岸超惠澄澄傳慧欽此皆口
相授受臻于壺奧欽俗姓徐洪州建昌人蓋漢孺子之
後也二十二尋師于臨川楮山後五歲削髮隸于高安
龍崗寺遂受戒有唐義淨則譯經上足曰洪州之靈傑

其東宣羯磨者曰兩京滌法

舊集與大粹同石本作兩京清滌使法下文斷缺當

考銳欽智度冲深神用高爽行無權實身絕開遮闡律

藏而日月光明騁辯才而龍象蹴蹈江嶺之外凜然風

生開元末北遊京充福先大德常誦大涅槃經而講之

兼明俱舍論維摩金剛經每登講座其下日有二三

人由是名動輦轂屬祿山作亂杖錫南歸居于西山洪

井雙嶺之間慕高僧觀顯之遺蹤於寺北菴置蘭若山

泉之美頗極幽絕欽雖堅持律儀而志在弘濟好讀周

易左傳下筆成章著律儀輔演十卷嘗撰本州龍興寺
戒壇碑頗見稱於作者三年真卿忝刺撫州東南四里
有宋侍中臨川內史謝靈運翻大涅槃經古臺階局儼
然軒構推圮有高行頭陀僧智清者首事修葺安居住
持明年秋七月真卿績秩將滿有觀察使尚書御史大
夫趙國魏公願以我皇帝降誕之成奏為寶應寺仍請
山林高行僧三七人冬十月二十三日聖恩允許於是
鼎新輪奐其興也勃焉仍請止觀大師法源法泉襄陽

乘覺清源善弘羅浮圓覺佛跡十喻餘杭慧達泊當州
海通海岸等同住薰修以資景福僉以為學徒雖增毗
尼未立明年三月乃請欽登壇而董振鐸焉仍俾龍崗
道幹天台法喬招提智融白馬法肩衡岳正覺同德義
盈香城藏選龍興藏志開元明徹等同秉法事於是遠
近駿奔道場側塞聖像放光而龍王不雨者四旬僧尼
等三百五十七人而文士正議大夫前衛尉少卿張延
臯脫俗歸真其名曰壞網為稱首焉又欽比年已年為

受具者凡一萬餘人江嶺湖海之間幅員千餘里像法
於變此皆欽教道之力焉臨川在嶺隅未嘗弘律於是
二衆三百餘人謂法裔敷演而依止之後有上都資聖
寺高德曰還本律主偉茲能深辨嗟嘆而贊美之請於
寺東南置普通無礙禪院院內立鎮國觀音道場請善
弘居之以開悟心要雲一上足曰智融精持本事如會
尊衆乃命智光等於普通道場東置律藏院初立戒壇
以佇欽公之來儀且施肇紀之不朽經營未幾壇殿鬱

興庶乎渡海浮囊分毫絕羅刹之請嚴身瓔珞照耀有
摩尼之光則入佛位而披伽梨者名香普薰神足無極
其可勝紀而蕪絕乎有唐大歷辛亥歲春三月行撫州
刺史魯郡開國公顏真卿書而誌之

撫州南城縣麻姑山仙壇記

麻姑者葛稚川神仙傳云王遠字方平欲東之括蒼山
過吳蔡經家教其尸解如蟬蛻也經去十餘年忽還語
家言七月七日王君當來過到期日方平乘羽車駕五

龍各異色旌旗導從威儀赫奕如大將也既至坐須臾引見經父兄因遣人與麻姑相聞亦莫知麻姑是何神也言王方平敬報久不行民間今來在此想麻姑能暫來有頃信還但聞其語不見所使人曰麻姑再拜不見忽已五百餘年尊卑有序修敬無階思念久煩信承在彼登山顛倒而先被記當按行蓬萊今便暫往如是便還還即親觀願不即去如此兩時間麻姑來來時不先聞人馬聲既至從官當半於方平也麻姑至蔡經亦舉

家見之是好女子年十八九許頂中作髻餘髮垂之至
要其衣有文章而非錦綺光彩耀日不可名字皆世所
無有也得見方平方平為起立坐定各進行厨金盤玉
杯無限美膳多是諸華而香氣達於內外擗麟脯行之
麻姑自言接待以來見東海三為桑田向問蓬萊水乃
淺於往者會時略半也豈將復還為陸陵乎方平笑曰
聖人皆言海中行復揚塵也麻姑欲見蔡經母及婦經
弟婦新產數十日麻姑望見之已知曰噫且止勿前即

求少許米便以擲之墮地即成丹砂方平笑曰姑故年少吾了不喜復作此曹狡獪變化也麻姑手似鳥爪蔡經心中念言背癢時得此爪以爬背乃佳也方平即知經心中所言乃使人牽經鞭之曰麻姑者神人汝何思其爪可以爬背邪見鞭著經背亦不見有人持鞭者方平告經曰吾鞭不可妄得也大歷三年真卿刺撫州按圖經南城縣有麻姑山頂有古壇相傳云麻姑於此得道壇東南有池中有紅蓮近忽變碧今又白矣池北下

壇傍有杉松皆偃蓋時聞步虛鍾磬之音東南有瀑布
淙下三百餘尺東北有石崇觀高石中猶有螺蚌殼或
以為桑田所變西北有麻源謝靈運詩題入華子岡是
麻源第三谷恐其處也源口有神祈雨驟應開元中道
士鄧紫陽於此習道蒙召入大同殿修功德二十七年
忽見虎駕龍車二人執節在庭中顧謂其友竹務猷曰
此迎我也可為吾發願欲歸墓本山仍請立廟於壇側玄
宗從之天寶四載投龍於瀑布石池中有黃龍見玄宗感

馬乃命修僊宇真儀侍從雲鶴之類於戲自麻姑發迹於茲嶺南真遺壇於龜原花姑表異於井山今女道士黎瓊仙年八十而容色益少僧妙行夢瓊仙而餐花絕粒紫陽姪男曰德誠繼修香火弟子譚仙巖法錄尊嚴而史玄洞左通玄鄒鬱華皆清虛服道非夫地氣殊異江山炳靈則曷由纂懿流光若斯之盛者矣真卿幸承餘烈敢刻金石而志之時則六年夏四月也

梁吳興太守柳惲西亭記

湖洲烏程縣南水亭即梁吳興太守柳惔之西亭也繚以遶峯浮於清流包括氣象之妙實資遊宴之美觀夫構宏材披廣榭豁達其外睽眾其中雲軒水閣當亭無暑信為仁智之所創制原乎其始則柳吳興惔西亭之舊所焉世增崇之不易其地按吳均入東記云惔為郡起西亭毗山二亭悉有詩今處士陸羽圖記云西亭城西南二里烏程縣南六十步跨苕溪為之昔柳惔文暢再典吳興以天監十六年正月所起以其在吳興郡理

西故名焉文暢嘗與郡主簿吳均同賦西亭五韻之作
由是此亭勝事彌著間歲頗為州僚處而有之日月滋
深室宇將壞而文人嘉客不得極情于茲憤憤悱悱者
久矣邑宰李清請而修之以摠衆君子之意役不煩費
財有羨餘人莫之知而斯美具也清皇家子名公之肩
忠肅明懿以將其身清簡仁惠以成其政絃歌二歲而
流庸復者六百餘室廢田墾者三百頃浮容臻輶迨乎
二千種桑畜養益於數萬官路有刻石之堠吏厨有食

錢之資敦本經久率皆如是畧舉數者其餘可知矣豈
必夜魚春躍而後見稱哉於戲以清之地高且才而勵
精於政事何患雲霄之不致乎清之筮仕也兩叅雋乂
之列再移仙尉之任毗贊於蜀邑子男於吳興多為廉
使盛府之所辟薦則知學詩之訓間緝之心施之於政
不得不然也縣稱繁舊矣今詔升為望清當受代而邑
人已軫去思之悲白府願留者屢矣真卿重違耆老之
請啟於十連優詔以旌清之美也某不佞忝當分憂共

理之寄人安俗阜固有所歸雖無魯臣掣肘之患豈盡
子言用力之術由此論之則水堂之功乃餘力也夫知
邑莫若州知宰莫若守知而不言無乃過乎今此記述
以備其事懼不宣美豈徒媿詞而已哉大歷一紀之首
夏也

吳興沈氏述祖德記

南齊徵士吳興沈君名麟士郡人也蘊道德晦于邑之
餘不溪家貧無資以織簾為業故時人號為織簾先生

精於禮傳嘗自詁訓宗人吏部郎中淵中書郎約累薦
徵為著作郎高卧不起名重江表臨終遺教依皇甫玄
宴棺中貯孝經一卷穿壙三尺置棺平土不設机位四
時地席玄酒而奠子彝奉而行之吳郡陸惠曉張融皆
為之誄徵士嘗製述祖德碑立於金鵝山之先塋年月
淹遠風雨蠹蝕朽字殘文翳而莫分乾元中為盜火所
襲碑首毀裂嵌然將墮過江二十葉孫御史中丞震移
牒郡國請具封葺或屬兵凶曠而莫修忽有朴樹生於

龜腹盤根抱趾聳幹夾碑疑如工造鬱若神化歆者復
正危而再堅夫德無名遇賢而鍾慶神無質假物以申
應沈氏積善既遠徵士植德既深天將興舊族乎吾知
沈之復大也權檢校宗事十九葉孫前太廟齋郎怡拜
泣松櫨增修舊塋感先碑之隕覆懼遺文之殘闕乃具
他石傳而貳焉崇其本所以尊先也建其新所以嗣德
也以真卿江南婚姻之舊中外伯仲之穆謬忝拜刺見
託斯文刊諸碑陰以傳無朽因改其樹為慶樹以旌其

美焉沈氏之故事具於家牒今闕而不紀時有唐大歷八年冬十二月

乞御書題額恩勅批荅碑陰記

肅宗皇帝恩許既有斯荅御札垂下而真卿以踈拙蒙譴粵若來八月既望貶授蓬州長史洎今上即位寶應元年夏五月拜利州刺史屬羌賊圍城不得入恩勅追赴上都為今尚書前相國彭城公劉公晏所讓授尚書戶部侍郎二年春三月改吏部廣德元年秋八月拜江

陵尹兼御史大夫充荆南節度觀察處置等使未行受
代轉尚書右丞明年春正月檢校刑部尚書兼御史大
夫充朔方行營汾晉等六州宣慰使以招諭太師中書
令僕固懷恩不行遂知省事永泰二年春二月貶峽州
別駕旬餘移貶吉州大歷三年夏五月蒙除撫州刺史
六年閏三月代到秋八月至上元爾來十有六年困於
踈愚累蒙竄謫其所採碑石迄今委諸巖麓之際未遑
崇樹七年秋九月歸自東京起家蒙除湖州刺史來年

春正月至任州東有蒼雲兩溪溪左有放生池焉即我
寶應元聖文武皇帝所置也州西有白鶴山山多樂石
於是採而斲之命吏幹磨礱之家僮鐫刻之建于州之
駱駝橋東蓋以抒臣下追遠之誠昭先帝生成之德額
既未立追思莫逮客或請先帝所賜勅書批荅荅中諸
事以緝而勒之真卿從焉勒願斯畢瞻慕不足遂志諸
碑陰庶乎乾象昭回與宇宙而終始天文煥發將日月
而齊暉時則有唐大歷九年青龍甲寅之歲孟春甲子

之日也

吳興地記

烏程縣

舊繫今望鄉四十里二百東去蘇州二百七十里南去杭州一百八十九里西北去揚州六百四十七里西去宣州三百一十七里北去東都二千八百七十五里北去上都三千七百七十里

帝顓頊塚

吳大帝陵

吳景帝陵

鈕皇后陵

吳丹陽太守蕪湖侯太史慈墓

吳大將軍朱治墓

吳蕩寇將軍程普墓

晉侍中羅含墓

晉黃門侍郎潘尼墓

齊宣城太守丘靈鞠墓

梁中書侍郎丘遲墓

梁司空康絢鎮墓

陳五兵尚書唐宗墓

長城縣

大雷山

芳巖

震澤

若溪

吳王夫柴廟

陳景帝陵

陳錢皇后陵

陳昭烈王陵

謝安墓

殷仲文墓

陳武帝故宅

陳文帝故宅

吳均故宅

金匱山志卷十三
陳氏五主屏風

陳高祖竹帳

國朝高僧南山律主道宣

安吉縣

天目山

崑山

橫溪

梅溪

蛟龍溪

翔鳳林

裴子野故宅

周弘讓故宅

姚萇雉尾扇

施世英金鍾

山川

卞山

法華寺

金井玉澗

乳竇石膏溫泉

項王走馬埒

項王飲馬池

項王繫馬石

衡山

帝顓頊塚

春秋鳩茲城

峴山

顯亭故別駕李適之石酒樽五花亭

杼山

妙喜寺黃浦橋

避它城

何楷釣臺

升山

吳均入東記

晉吳興太守王羲之烏亭

金蓋山

何氏書堂

張邵丘道祚禪幽寺

太湖

周迴四萬八千頃

雪溪

白蘋洲

顏魯公集卷十三

欽定四庫全書

顏魯公集卷十四

唐 顏真卿 撰

記

宋州官吏八關齋會報德記

欽石幢事附

夫德之所感淪骨髓而非深誠之所至去神明而何遠
有唐大歷壬子歲宋州八關齋會者此都人士衆文武
將吏朝散大夫使持節宋州諸軍事行宋州刺史兼侍

御史本州團練守捉使賜紫金魚袋徐向等奉為河南
節度觀察使開府儀同三司太子太師左右僕射知省
事兼御史大夫汴州刺史上柱國信都郡王田公頊疾
良已之所建也公名神功冀州南宮人稟元和之粹靈
膺期運以傑出含弘厚下正直率先起孝而德感生人
竭忠而精貫白日和衆必資於寬簡安人務在於撫柔
況乎武藝絕倫英謀沈秘所向而前無強敵日新而學有
緝熙故能殿天子之邦鬱蒼生之望有日矣羯構逆公

以平盧節將佐今右僕射李公忠臣收滄德攻相州拒
杏園守陳留許叔冀降而陷焉思明懼忠臣圖已令公
佐南德信隨劉從諫收江淮至宋州欲襲李銑公斬德
信走從諫遂并其衆而報焉肅宗大悅拜公鴻臚卿再
襲敬釭於鄆州加中丞討劉展于潤州斬平之遷徐州
刺史明年拜淄青節度使屬侯希逸自平盧至公以州
讓之時宋州刺史李岑為賊所圍副元帥李光弼請公
討平之拜御史大夫加開府充兗鄆節度破法子營又

討敬釭歸順焉史朝義聞之奔下博投范陽自縊死
廣德元年授戶部尚書封信都郡王上幸陝公首末扈
從都知六年兵馬每食宿公皆躬自省視上感焉方委
以政事公涕泣固辭而止二年拜汴宋節度遷兵部大
歷二年加右僕射封母清州張氏為趙國夫人妻信安
郡王禕女為涼國夫人太夫人慈和勤儉睦于親黨公
性純孝居常不離左右閱讀書史或時疾病公輒累月
不如葷家中禮懺不絕仍造崇夏弘聖二寺以祈福祐

五年兼判左僕射知省事加太子太師公德厚量深勞
謙重慎功既高而心益下位彌大而體益恭故遠無不
懷邇無不肅今夏四月忽嬰熱疾沈頓累旬積善降祥
勿藥造喜鷹犬之翫悉皆棄捨羣帥感焉無復弋獵四
履之內咸懷歡欣睢陽之人踊躍尤甚乃咨于州將曰
昔我公之陷賊也至敝邑而首誅德信李岑之見圍也
破其黨而克保城池是即我公再有大造于敝邑矣微
我公之救恤則皆死於鋒鏑入於煎熬矣尚何能保完

家室嬉戲鄉井者乎不資齋明何以報德徐公悅而從之來五月八日首以俸錢三十萬設八關大會飯千僧于開元伽藍將佐爭承唯恐居後已而州縣官吏長史苗藏實等設一千五百人為一會鎮遏團練官健副使孫琳等設五百人為一會耆壽百姓張烈等設五千人為一會法筵等供仄塞於郊垌贊唄香花喧填於晝夜其餘鄉村聚落來往舟車聞風而靡督自勤聳惠而沐先胥懋者又不可勝數矣非夫美政淳深德風汪濊則

何以感人若此其至者乎某叨接好仁飽承餘烈親茲
盛美益覩求蒙若不垂諸將來則記事者奚述

敘石幢事

宋州刺史崔倬

會昌中有詔大除佛寺凡鎔塑繪刻堂閣殿宇關
於佛祠者焚滅銷破一無遺餘遣御史覆視之州
縣震畏至於碑幢銘鏤贊述之類亦皆毀折瘞藏
之此州開元寺先有太師魯郡顏公以郡守僚吏
州人等為連帥田氏八關齋會鐫記大幢立石表

大而圍再幾尋程材巨異八觚如砥偉詞逸翰龍
躍鸞翔時刺史邑宰以其大不可拆遂鑿鑿缺敗
以仆之蓋三面僅存委埋于土倬大中己巳歲守
郡明年嘗暇日訪求前賢事蹟郡從事涂君因言
有魯公石幢索而得之壇壤之下癰瘕壞失文義
乖絕尋譯研究不可復知意其邑居之中必有藏
錄其文者果於前刺史唐氏之家得其模石本未
完備炳然輝耀溢目倬自幼學慕習魯公書法纔

不能窺涉其門宇然惜其高蹤埋沒遂命政治其
傷殘補續其次雖真贗懸治越貂狗相屬且復瞻
仰魯公遺文昭示於後矣大中五年正月一日敘
通議大夫守太子賓客東都副留守雲騎尉崔倬記
贈尚書左僕射博陵崔孝公宅陋室銘記

公諱沔字若冲博陵安平人其先出于齊太公之後自
亭伯三世文宗祕書監六支派別叔軌季則俱死王事神
謙神通並高循績子彭弘度以武幹稱景雋巨倫以文

行著繼方面者累代列史傳者十人奕葉相仍恒為鼎族曾祖弘峻隋銀青光祿大夫趙王長史祖儼皇朝益州雒縣令父暄年未四十為庫部員外郎因擇能吏為壽安令又充江西道廉察使徙醴泉遂厯四邑盤桓不進以剛正也累至朝散大夫汝州長史封安平縣男贈衛尉少卿公即安平之次子也全德天至成人玉立蓋聖代之寶臣華宗之孝子文章之哲匠禮樂之祖師既不可以一名又何能以悉數年二十四舉鄉貢進士考功

郎李迥秀器異之曰王佐才也遂擢高第其年舉賢
良方正對策萬數公獨居第一而兄渾亦在甲科典試
官梁載言陳子昂歎曰雖公孫臯却不及也召見前殿
拜麟臺校書郎繇是名蓋天下御史張思敬以德行薦
久之以資授陸渾主簿平陽王敬暉弘度外之交畧上
官之禮丁府君憂外除太夫人勉起之以所試超邁擢
拜左補闕遷殿中侍御史奉敕按竊金者公得其情許
之不死竟得減論諸王或恃貴不遵法度舉而按之其

不吐茹也如此尋遷起居舍人當扈從以親老抗疏乞
退薦琅琊王丘太原郭汾陽海封希顏等自代睿宗嘉
之特許留司以遂其孝養遷祠部員外郎倖僧有請度
人者公拒不奉詔遷給事中大理卿韓思復用法小差
權臣致劾公特寬之遷中書舍人省改紫薇其官仍舊
又固辭以親老除虞部郎中開元初攝御史中丞或訟
吏曹之不平公與崔泰之銜命詳理多所收拔俄而即
真兼都畿按察使歲或不稔公請發粟賑貸之賴全活

者以萬數內謁者霍玄橫於市公執之以聞玄宗使以
璽書勞之公之澄清率多類此畿縣令長陸景融劉體
微盧暉有異政丞尉宋遙皇甫翼陳希烈宋鼎蕭隱之
范冬芬楊慎餘劉日正高昌寓州掾李瑱裴曠等並以
清白吏能而薦於上洎二年置十道採訪使公所舉六
人在焉執事子有干法者公舉之不回移著作郎尋遷
祕書少監修國史使尋判大理卿禮部侍郎公既職司
典禮乃刪寫詔論數百卷以備闕遺特加朝散大夫遷

左庶子丁太夫人憂徵拜中書侍郎出為魏州刺史乃
肇移元城徙置新市吏人便之乙丑歲玄宗東封知頓
奏課第一賜絹二百疋嶽下觀禮獻慶雲頌又賜絹一
百疋明年入朝分掌十銓公與王丘為選人所歌曰沔
人澄明徹底清丘山介直連天峻時人贈之還州以理
有異績御史大夫崔隱甫中丞宇文融朝服表薦墨書
寵慰無何徵拜左散騎常侍上以太宮親蠶絲賜近臣
公獻御絲賦又侍讌別殿賦端午詩屢蒙錫以縑帛綵

羅兼判國子祭酒俄充東都副留守十七年有事陵廟
追贈安平公及太君十八年上皇車駕還罷留守二十
年春奉敕撰龍門公宴詩序賜絹百疋延入集賢院修
老子道德經疏行於天下二十一年遷祕書監修撰如
故屬耕籍田為居守賜絹百疋遷太子賓客出兼懷州
刺史二十四年罷州又以本官充東都副留守累加通
議大夫二十七年冬十一月有七日寢疾薨于位春秋
六十有七玄宗震悼贈禮部尚書葬日量借手力幔幙

故吏前監察御史博陵崔頌為公行狀云公德充符契精貫人極孝愛聞於天下制作垂於無窮執太夫人之喪徒跣吐血以身為糞土況乎含弘內恕夷坦外名德至矣乎今之達者若以富貴崇德行藏養高則老萊闕於榮親黔婁褊於謀道又加於古人矣故養則致其樂喪則過乎哀以兄姊之戚亞其親甥姪之慈甚其子至於藥砭備物溫清異宜手胝杵臼之間身辱澣濯之伍汲汲然矣每至宗廟心齋嚴恭祀事明發不寐翌日餘

悲故聲氣感人者深儀形化人者遠躬踐五德退讓於
恭儉溫良行張四維加信於仁義禮智而老驥伏櫪以
鮑驄不忘白鳩巢檐以家瑞終默則非殊倫絕輩擬議
乎萬一矣太常博士裴總議曰公醇一誕靈文明含粹
蹈元和以為天性籍間氣以為人師前後厯官或拜而
不至或至而不留瘠形瞽目誓遵孝養可不謂孝乎遂
謚曰孝公凡所著文集二十九卷并嗣子祐甫論次先
志一卷為三十卷吏部員外郎趙郡李華為集序云公

之侍親也孝達乎神祇居憂也哀貫乎天地喪期有數而茹毒終身親交隣里饑者待公而炊寒者待公而裘蒸嘗之莫待公而具故祿廩雖厚而未嘗足也傳祖禰之美合於禮經見公文章知行事則人倫之序理亂之源備矣祐甫純行而文直清而和希公門者謂公存焉亡賢數載如此初太夫人患目公傾家求醫或曰療之必愈恐壽不得延太夫人及公悲恨而罷自是端力奉養不脫冠帶者僅三十年每至良辰美景勝引佳遊必

扶持左右笑言陳說親朋往來莫知太夫人之有苦也
公年官雖高至於食果蔬菜與子姪躬自植藝溉灌以
申馨潔泉終喪雖見孩稚者必設位束帶盡哀以禮之
公與江夏李邕友善為校書郎時引邕館於祕閣之下
讀書者累年邕由是才名益盛邕與尚書席建侯嘗過
公怪乘馬羸羸曰何不於廳前自觀餽飼忽然致殞何
以更之公唯而不易他日二公又以為言公良久則曰
每欲發言恐涉有疑於廝養者所以沈吟自媿二公退

而謂人曰每想崔公此言使人慙慙如醉延和太極之間公既留司東都遂鬻所乘馬就故人監察御史張洸子深河南府崇政坊買宅以製居建宗廟於西南維先太夫人安平郡夫人堂在宅之中儉而不陋淨而不華六十餘年櫟棟如故堂東嫂盧夫人所居堂之東北鄭氏李氏姊歸寧所居堂之北五步之外建瓦堂三間以居之雜用舊椽不崇壇無赭堊累厯清要所得祿秩但奉蒸嘗資嫂妹給孤幼營甥姪婚姻而已朝衣服馬一

皆取其下者唯祭器祭服稱禮焉其室竟不修洎夫人
太原郡太夫人王氏捐牀帳之後公徙居他室或在賓
館而無常所為常侍時著陋室銘以自廣天寶末子孫
灑掃貯書籍劍履而已逆胡再陷洛陽屋遂崩圯唯簷
下廢井存焉長子成甫倜儻有才名進士校書郎早卒
祐甫能荷先業以進士高第累登臺省至吏部郎中充
永平軍節度使尚書李公勉行軍司馬兼侍御史中丞
永懷先德明發不寐恐茂烈湮淪罔垂後裔乃刻陋室

銘於井北遺址之前以抒所心某夙仰名教實欽孝公之盛德晚聯臺閣竊慕中丞之象賢又能好我不遺見託論譔採風猷而莫窮萬一涉泉海而豈究津涯操筆強名退增戰慙時即大厯十一年青龍景辰孟夏之月也

撫州寶應寺翻經臺記

撫州城東南四里有翻經臺宋康樂侯謝公元嘉年初於此翻譯涅槃經因以為號公諱靈運陳郡陽夏人也

祖玄晉車騎將軍父瓊祕書郎公幼穎悟好學博覽羣書文章之美江左莫逮以襲祖爵世人宗之盛稱謝康樂初為劉毅衛軍從事中郎太子左率出為永嘉太守郡有各山水公素愛好肆意遨遊稱疾去職於始寧縣修營故墅傍山帶江盡幽居之美因著山居賦并自註之與隱士王弘之等遊放為娛有終焉之志每一詩至都邑莫不競寫宿昔之間士庶皆遍徵為祕書監再召不赴太祖使范泰與書敦獎之乃出就職尋遷侍中日

夕引見賞過甚厚多疾不朝賜假東歸免官與從弟惠連東海何長瑜潁川荀道雍泰山羊璿之以文章賞會時人謂之四友尋山登賞常着木屐上則去其前齒下則去其後齒會稽太守孟顗事佛精懇公謂之曰得道應須惠業大人生天應在靈運前成佛必在靈運後顗深恨此言後遂表公有異志公馳出自陳太祖知見誣除臨川內史公以曇無讖所翻大涅槃經語小小朴質不甚流靡品數踈簡初學者難以措懷乃與沙門范惠

嚴崔慧觀依舊泥洹經共為潤色勒成三十六卷義理
昭暢質文相宣厯代寶之盛行於天下其餘感神徵應
具如高僧傳所說邈乎階局不改棟宇具無真卿叨刺
是邦茲用愜息有高行頭陀僧智清緒發洪誓精心住
持請以佛跡寺僧什喻仙臺觀道士譚仙岳同力增修
指期恢復自是法堂之遺構克崇先達之高蹤百里而
遙四山不逼三休而上十地方超經行之業既崇斗數
之功斯楸大厯己酉歲四月丙午都人士庶相與大會

設嚴供而落焉以真卿業于斯文見容紀述後之君子
其忘增修乎銘曰

摩訶般若解脫法身是則涅槃衆經中尊曇無摩訶
觀是因實賴同德弘茲法輪謝公發揮精義入神理絕
史野文兼郁彬一垂刊削百代咸遵遺跡忽睹高臺嶙
峋載悲徂謝曷踐音塵真卿愀然憫故孰新檀那衣鉢
悉力經綸不日復之周邦仰仁緬懷孰慕予亦何人徒
願神交愧非德隣刻銘金石永永不泯

張長史十二意筆法意記

予罷秩醴泉特詣京洛訪金吾長史張公請師筆法長史于時在裴儼宅憩止有羣衆師張公求筆法或有得者皆曰神妙僕頃在長安二年師事張公皆大笑而對之即便草書或三紙五紙皆乘興而散不復有得其言者僕自再於洛下相見眷然不替僕因問裴儼足下師張長史有何所得曰但書得絹屏素數十軸亦嘗論諸筆法唯言倍加功學臨寫書法當自悟耳僕自停裴

家月餘日因與裴儼從長史言語散却迴京師前請曰
既承九大獎諭日月滋深夙夜工勤溺於翰墨儻得聞
筆法要訣終為師學以冀至於能妙豈任感戴之誠也
長史良久不言乃左右眄視拂然而起僕乃從行歸東
竹林院小堂張公乃當堂踞牀而坐命僕居於小榻而
曰筆法玄微難妄傳授非志士高人詎可與言要妙也
書之求能且攻真草今以授之可須思妙乃曰天平謂
橫子知之乎僕思以對之曰常聞長史示令每為一平

畫皆湏令縱橫有象此豈非其謂乎長史乃笑曰然而
又問曰直謂縱子知之乎曰豈不謂直者從不令邪曲
之謂乎曰均謂間子知之乎曰嘗蒙示以間不容光之
謂乎曰密謂際子知之乎曰豈不為築鋒下筆皆令宛
成不令其踈之謂乎曰鋒為未子知之乎曰豈不謂以未
成畫使其鋒健之謂乎曰力謂骨體子知之乎曰豈不
謂趯筆則點畫皆有筋骨字體自然雄媚之謂乎曰轉
輕謂屈折子知之乎曰豈不謂鈎筆轉角折鋒輕過亦

謂轉角為闕闕過之謂乎曰決謂牽掣子知之乎曰豈
不謂為牽為掣決意挫鋒使不怯滯令險峻而成以謂
之決乎曰補謂之不足子知之乎曰豈不謂結點畫或
有失趣者則以別點畫旁救之謂乎曰損謂有餘子知
之乎曰豈不謂趣長筆短常使意勢有餘點畫若不足
之謂乎曰巧謂布置子知之乎曰豈不謂欲書先預想
字形布置令其平穩或意外字體令有異勢是謂之巧
乎曰稱謂大小子知之乎曰豈不謂大字處之令小小

字展之為大兼令茂密所以為稱乎長史曰子言頗皆
近之矣夫書道之妙煥乎其有旨焉字外之奇言所不
能盡世之書者宗二王元常逸跡曾不睥睨筆法之妙
遂爾雷同獻之謂之古肥旭謂之今瘦古今既殊肥瘦
頗反如自省覽有異衆說芝鍾巧趣精細殆同自機神
肥瘦古今豈易致意真跡雖少可得而推逸少至於學
鍾勢巧形容及其獨運意疎字緩譬猶楚晉習夏不能
無楚過言不悞未為篤論又子敬之不逮逸少猶逸少

之不逮元常學子敬者畫虎也學元常者畫龍也余雖不習久得其道不問之言必慕之歟儻有巧思思盈半矣子其勉之工精勤悉自當妙矣真卿前請曰幸蒙長史傳授筆法敢問工書之妙如何得齊於古人張公曰妙在執筆令其圓轉勿使拘攣其次諸法須口傳手授之訣勿使無度所謂筆法也其次在於布置不慢不越巧使合宜其次紙筆精佳其次諸變適懷縱捨規矩五者備矣然後齊於古人矣敢問執筆之理頗得長史曰

予傳授筆法之老舅彥遠曰吾聞昔日說書若學有工而跡不至後聞於褚河南曰用筆當須如印泥畫沙思所以不悟後於江島遇見沙地平淨令人意悅欲書乃偶以利鋒畫其勁險之狀明利媚好乃悟用筆如錐畫沙使其藏鋒畫乃沈著當其用鋒常欲使其透過紙背此功成之極矣真草用筆悉如畫沙則其道至矣是乃其迹可久自然齊古人矣但思此理以專想工用故其點畫不得妄動子其書紳余遂銘謝再拜逡巡而退自

此得攻書之術于茲五年真草自知可成矣

平直均密
鋒力轉決

補損巧稱

為十二意



顏魯公集卷十四

欽定四庫全書

集部

顏魯公集卷十五

詳校官侍郎_臣李封

檢討_臣何思鈞覆勘

總校官檢討_臣何思鈞

校對官編修_臣李鎔

謄錄監生_臣雷輅

欽定四庫全書

顏魯公集卷十五

唐 顏真卿 撰

詩

題杼山三癸亭

亭陸鴻漸所
創得暮字

杼山多幽絕勝事
盈跬步前者雖登攀
淹留恨晨暮及
茲紆勝引曾是美無度
歛構三癸亭寔惟陸生故
高賢
能知物疏鑿皆有趣
不越方丈間居然雲霄遇
巍峩倚

修岫曠望臨古渡左右苔石攢低昂桂枝蠹山僧狎猿
狄巢鳥來枳棋俯視何楷臺傍瞻戴顓路遲迴未能下
夕照明村樹

謝陸處士杼山折青桂花見寄之什

羣子遊杼山山寒桂花白綠萸含素萼採折自逋客忽
枉岩中詩芳香潤金石全高南越蠹豈謝東堂策會慙
名山期從君恣幽覲

登平望橋下作

登橋試長望望極與天平際海蒹葭色終朝見鴈聲近

山猶

一作全

髣髴遠水忽微明更覽諸公作知高題柱名

登峴山觀李左相石樽聯句

李公登飲處因石為窪樽頓人事歲年改峴山今古存

劉全白

蓁蕪掩前跡苔蘚餘舊痕裴叔子尚遺德山公此

迴軒

張薦

維舟陪高興感昔情彌敦道士吳筠藹藹賢哲事依

依離別言

強蒙

嶇嶇欽橫道周迢遞連山根

范縉

餘烈曖林野

衆芳揖蘭蓀

王德暉

映岩足勝賞延高原

魏理

遠水明匹

練因晴見吳門

王甫修

陪遊追盛美揆德欣討論

顏

器有

成形用功資造化元

左輔元

流霞方泔淡別鶴遽翩翻

劉

舊規傾逸賞新興麗初暎

顏

醉後接羅倒歸時騶騎喧

楊德元

遲迴向遺跡離別益傷魂

韋

覽事古興屬送人歸

思繁

皎然

懷賢久但謝贈遠空攀援

崔

八座欽懿躅高名

播乾坤

史仲宣

松深引閒步葛弱供險捫

陸羽

花氣酒中馥

雲華衣上屯

樵器

森沈列胡樹牢落望郊園

陸士修

白日半

巘岫清風滿丘樊

裴幼清

旌麾間翠幄簫鼓來朱轡

柳

間

路躡雲影清心澄水源

釋塵

萍連浦中嶼竹遶山下村

顏顥

景落全溪暗烟凝半嶺昏

顏顥

去日往如復換年涼代溫

顏顥

登臨繼風騷義激舊府恩

李萼

水堂送諸文士戲贈潘丞聯句

居人未可散上客須留著莫唱阿鞞回應云夜半樂

顏顥

奉潘丞

詩教刻燭賦酒任連盤酌從他白眼者終戀青山

郭陸述奉

三林栖非姓許寺住那名約會異永和年才同建

安作

羽呈權十四

何須問更漏但遣催絃索共說長句能皆

言早歸惡

器別然公

那知殊出處還得同笑謔雅韻雖慙懽

禪心肯拋却

皎然上侍御

一宿同高會幾人歸下若簾開北

陸風燭焯南枝鵲

萼奉潘十五

文場苦叨竊釣渚甘漂泊弱

質幸見容菲才誠重諾

送耿漳拾遺聯句

堯舜逢明王嚴徐得侍臣分行接三事高興栢梁新

真卿

楚國千山道秦城萬里人鏡中看齒髮河上有烟塵

漳

望闕飛青翰朝天憶紫宸喜來歡宴洽愁去詠歌頻

真卿

顧盼情非一睽攜處亦頻吳興賢太守臨水最殷勤漳

三言擬五雜組

五雜組繡與錦往復還興又寢不得已病伏枕

五言月夜啜茶聯句

泛花邀坐客代飲引情言

陸士修

醒酒宜華席留僧想獨

園

張薦

不須攀月桂何假樹庭萱

李夢

御史秋風勁尚書北

斗尊

崔萬

流華淨肌骨疏淪滌心原

真卿

不似春醪醉何辭

綠菽繁

晝

素瓷傳靜夜芳氣滿閑軒

士修

三言重擬五雜組

五雜組甘鹹醋往復還烏與兔不得已韶光度

五言夜宴詠燈聯句

桂酒牽詩興蘭缸照客情

士修

詎慙珠乘朗不讓月輪明

張薦

破暗光初白浮雲色轉青

真卿

帶花疑在樹比燎欲分

庭

畫

顧已慚微照開簾識近汀

真卿

三言喜皇甫曾侍御見過南樓翫月

喜嘉客闢前軒天月淨水雲昏

真卿

鴈聲苦蟾影寒聞裏

浥滴檀欒

陸羽

歡宴處江湖間

皇甫曾

卷翠幕吟嘉句恨清

光留不住

李萼

高駕動清角催惜歸華重徘徊晝露欲晞

客將醉猶宛轉照深意

陸士修

七言重聯句

頃持憲節推高步獨占詩流橫素波不是中情深惠好

誰能千里遠經過

真卿

詩書宛似陪康樂少長還同宴永

和夜酌此時省碾玉晨趨幾日重鳴珂

曾萬井

更深空

寂寞千方霧起隱嵯峨熒熒遠火分漁浦
厯厯寒枝露

鳥窠芻漢朝舊學君公隱魯國今從弟子科只自傾心
慚响嚅何曾將口恨蹉跎羽獨賞謝吟山照曜共知殷
歎樹婆娑華轂空嫌雲路隔網衣長向雪峰何畫

五言送李侍御聯句

吾友駐行輪遲遲惜上春

真卿

東西出餞路惆悵獨歸人

畫歡會期他日驅馳恨此身

薦

須知貢公望從此願相

因

五言翫初月重送聯句

春溪與岸平
初月出溪明

薦上十
二老丈

壁彩寒仍潔
金波夜

轉清

萼

孤光遠近滿
練色往來輕

真卿

望望隨蘭棹
依依

出柳城
畫

五言重送橫飛聯句

春田草未齊
春水滿長溪

萼上十
二兄

出餞風初煖
攀光日

漸西

真卿

歸期江上遠
別思月中迷
畫

七言大言聯句

高歌閨風步瀛洲

畫

燁鵬淪鯤食
未休

真卿

四方上下無

外頭

夢

一啜頻涸滄溟流

薦

七言小言聯句

長路遙遙吞吐絲

真卿

焦冥蚊睫察難知

書

七言樂語聯句

苦河既濟真僧喜

夢

新知滿座笑相視

真卿

戍客歸來見

妻子書學生放假偷向市

薦

七言囋語聯句

拈餽舐指不知休

夢

欲炙侍立涎交流

真卿

過屠大嚼肯

知羞畫食店門外強淹留薦

七言滑語聯句

雨裏下山踏榆皮

真卿

莓苔石橋步難移畫蕪莢醬醋喫

煮葵

金白

縫靴蠟線油漆錐驚急逢龍背須且騎

李益

七言醉語聯句

逢糟遇麪便酩酊

金白

覆車墜馬皆不醒真卿倒著接離髮

垂領畫

狂心亂語無人並羽

五言夜集聯句

寒花護月色墜葉占風音晝茲夕無塵慮高雲共片心

真卿

刻清遠道士詩因而繼作

清遠道士及李太尉詩皮日休所載附

不到東西寺于今五十春
竭來從舊賞林壑宛相親
吳子多歲日秦皇厭聖辰
劍池穿萬仞盤石坐千人
金氣騰為虎琴臺化若神
登壇仰生一捨宅歎珣珉
中嶺分雙樹迴巒絕四隣
窺臨江海接崇飾四時新
客有神仙者於茲雅麗陳
名高清遠峽文聚斗牛津
跡異心寧間

聲同質豈均悠然千載後知我揖光塵

清遠道士同沈恭子遊虎丘寺有作

我本長殷周遭罹歷秦漢四瀆與五嶽名山盡幽
竄及此寰區中始有近峯翫近峯何鬱鬱平湖渺
瀾漫吟挽川之陰步上山之岸山川共澄澈光彩
交凌亂白雲翦欲歸青松忽消半客去川島靜人
來山鳥散谷深中見日崖幽曉非旦聞子盛遊遨
風流足詞翰嘉茲好松石一言常累嘆勿謂余鬼

神忻君共幽贊

李太尉退和

茂苑有靈峰嗟余未遊觀
歲山在平陸壞谷為高
岸岡繞數仞牆巖潛千丈幹
乃知造化意迴斡資
奇翫鏐騰昔虎踞劍沒嘗
龍煥潭黛入海底崑崙
聳霄半層巒未昇日哀
抗寧知旦綠篠夏凝陰
碧林秋不換冥搜既窈
窕迴望何蕭散川晴嵐
氣收江春雜英亂逸人
綴清藻前哲留篇翰共
扣哀玉

音皆舒文繡段難追彥回賞

褚彥回曰凡人所稱
常過其實唯見虎丘

真逾其
所聞

徒起興公嘆一夕如再升含毫星斗爛

皮日休所載

虎丘山有清遠道士詩其所稱自殷周而歷秦漢
迄乎近代抑二千年来以鬼神自謂亦神怪之甚
者格之以清健飾之以俊麗一句一字若奮若搏
彼建安詞人儻在不得居其右矣顏太師魯公愛
之不暇遂刻于巖際并有繼作李太尉衛公欽清

速之高致慕魯公之素尚又次而和之顏之叙事也典李之屬思也麗並一時之寡和又幽獨君詩二首亦甚奇愴嗜古者觀而樂之余因撻而為和荅幽獨君一篇不知孰氏之作其詞古而悲亦存於篇末太玄曰太無方易無時然後為鬼神也噫清遠道士果鬼神乎抑道者流乎抑隱君子乎詞則已矣人則吾不知也

五言使過瑤臺寺有懷圓寂上人

井序

真卿昔以天寶元年尉醴泉丞過瑤臺寺圓寂上人
院秩滿遷監察御史巡覆諸陵而上人已離此寺大
歷十三年春二月以刑部尚書謁拜昭陵慨然有懷
其詞曰

上人居此寺不出三十年靈法盡無染

舊集作萬法元無著

一心

唯趣禪忽紆塵外軫遠訪世間緣

舊本作區中緣

及爾不復見

支提猶岌然

舊本作歸以真蹟校

贈僧皎然詩

秋意西山多別岑
紫左次繕亭歷三癸
錯趾鄰什寺元
化隱靈蹤始君啓
高致誅榛養翹楚
鞭草理方穗俯砌
披水容逼天掃峰
翠境新耳目換物
遠風塵異倚石忘
世情援雲得真意
嘉林幸勿剪禪侶
欣可庇衛法大臣
過佐遊羣英萃龍
池護清激虎節到
深邃徒想嶧頂期
于今沒遺記

顏魯公集卷十五

欽定四庫全書

顏魯公集卷十六

唐 顏真卿 撰

補遺

唐故通議大夫行薛王友柱國贈秘書少監國子

祭酒太子少保顏君廟碑銘

并序

昔孔悝有彛鼎之銘陸機有祠堂之頌皆所以發揮祖德敷演家聲故君子之觀其銘也既美其所稱又美其

所為無而稱之是誣也有而不述其仁乎論而譏之敢
不祇懼君諱惟貞字叔堅其先出於顓頊之孫祝融融
孫安為曹姓其裔邪邾武公名夷甫字顏子友別封邾
為小邾子遂以顏為氏多仕魯為卿大夫孔門達者七
十二人顏氏有八戰國有率躅秦有芝貞漢有異肆安
樂其後喪亂譜牒淪亡魏有裴盛盛字叔臺青徐二州
刺史關內侯始自魯居于琅邪臨沂孝悌里生廣陵太
守給事中葛繹貞子諱欽字公若精韓詩禮易尚書學

者宗之生汝陰太守護軍裴葛繹子諱默字靜伯生晉
侍中右光祿大夫西平靖侯諱含字弘都隨元帝過江
已下七葉葬在上元幕府山西生侍中光祿勳西平定
侯諱髦字君道事具孝行傳生州西曹騎都尉西平侯
諱絳字文和生宣城太守御史中丞諱靖之字茂宗生
巴陵太守度支校尉諱騰之字弘道善草隸書有風格
梁武帝草書評云顏騰之賀道力並便尺牘少行於代
生輔國江夏王參軍諱炳之字叔豹以能書稱生齊侍

書御史兼中丞諱見遠字見遠和帝被弒一慟而絕梁武深恨之事見梁周北齊書生梁鎮西記室參軍諱協字子和感家門事義不求聞達元帝著懷舊詩以傷之撰晉仙傳五篇日月災異圖兩卷文集廿卷見梁書生北齊給事黃門侍郎待詔文林館平原太守隋東宮學士諱之推字介著家訓廿篇冤魂志三卷證俗音字五卷文集卅卷事具本傳黃門兄之儀周御正御史中大夫麟趾學士隋文輔政不署矯詔索璽又拒之出為集

州刺史新野公後朝朔望引至御榻曰見危授命臨大節而不可奪古人所重何以加卿事具周書弟之善隋葉令子孫見於後黃門生皇秦王記室諱思魯愍楚遊秦小記室字孔歸君之曾祖也隋司經校書東宮學士率子弟奉迎義旗於長春宮招爪州拜儀同博學善屬文自為父集序國史稱溫大雅在隋與思魯同事東宮彥博與愍楚直內史省彥博將與遊秦同典校秘閣二家兄弟各為一時人物之選少時學業顏氏為優其後

職位溫氏為盛溫氏譜亦載焉生勤禮字敬君之祖也
幼而朗悟識量弘遠工於篆籀尤精詁訓解褐校書郎
與兩兄弟師古相時同時為弘文崇賢學士弟育德又
於司經校定經史當代榮之太宗嘗令師古讚崇賢學
士以兄弟特命蕭鈞讚之曰依仁服義懷文守一履道
自居下帷終日德彰素里行成蘭室鶴鑰馳譽龍樓委
質著作郎修國史夔府長史贈虢州刺史生昭甫敬仲
殆庶無恤少連務滋辟強昭甫字周卿君之父也幼而

穎悟尤明詁訓工篆籀草隸書與內弟殷仲容齊名而
勁利過之特為伯父師古所賞重每有注述必令參定
嘗得古鼎廿餘字舉朝莫識盡令讀之高宗侍讀曹王
屬贈華州刺史真卿表謝肅宗批答卿之乃祖當為碩
儒既高倚相之能遂有臧孫之後不墜其業在卿之門
生我伯父諱元孫洎君伯父聰穎絕倫尤工文翰舉進
士考功郎劉奇特標榜之由是名動海內累遷太子舍
人玄宗監國專掌令畫嘗和遊苑詩批云孔門稱哲宋

室聞賢翰墨玄捷莫之與先歷滁沂濠三州刺史贈秘書監君仁孝友悌少孤育舅殷仲容氏蒙教筆法家貧無紙筆與兄以黃土掃壁木石畫而習之故特以草隸擅名天授元年糊名考校判入高等以親累授衢州參軍與盈川令楊炯信安尉桓彥範相得甚歡又選授洛州溫縣永昌二尉每選皆判入高科侍郎蘇味道以所試示於衆曰選人中乃有如此書判嗟歎久之遂代兄為長安尉太子文學以清白五為察訪使魏奉古等所

薦王郎初開盛選僚屬拜薛王友柱國伯姊御史大夫
張知泰妻魯郡夫人亡將葬數家占君不宜臨壙君哭
而拒之曰豈有忘手足之痛牽拘忌而忍自絕乎弗從
其年秋七月才生明邁疾而歿教義者隱而傷焉與會
稽賀知章陳郡殷踐猷吳郡陸象先上谷寇泚河南源
光裕博陵崔璩友善事具陸據所撰神道碑累贈秘書
少監國子祭酒太子少保真卿表謝肅宗批答云卿之
先人德行優著學精百氏藝絕六書頻擢甲科屢升循

政曳裾王府名右鄒枚載筆春宮道高徐沈既而壽非
華髮器紆青雲業載史臣慶傳令子追存盛美褒贈崇
班且旌善於義方俾揚名於有後濠州生春卿杲卿曜
卿旭卿茂曾春卿工詞翰倜儻有吏材蘇頲舉茂才偃
師丞杲卿丈理清峻所居有聲太常居攝常山太守祿
山反擒其心手開土門拜衛尉卿兼中丞城陷杲卿叱
詈之遂被鉤舌支解而終贈太子太保謚曰忠節真卿
表謝肅宗批答云自羯胡猖狂入我河縣所在官更多

受迫脅卿兄以人臣大節獨制橫流或俘其謀主或斬其元惡當以救兵懸絕身陷賊庭旁若無人歷數其罪手足寄於鋒刃忠義形於顏色古所未有朕甚嘉之曜卿工詩善草隸十五以文學直崇文館淄州司馬旭卿善草書脣山令茂曾善屬文詁訓仁厚絕衆健為司馬君生闕疑允南喬卿真長幼輿真卿允藏闕疑仁孝有吏能精詩傳善剖判杭州參軍允南仁孝有清識工詩人多誦其佳句善草隸與春卿杲卿曜卿同日於銓庭

為侍郎席建侯所賞達奚珣薦為左補闕真卿時為殿
中正至三拱法座蹈舞而衣袂相接者三故允南賦詩
云誰言百人會兄弟也霑陪歷殿中膳部司封郎中司
業金鄉男喬卿仁和有吏幹富平尉真長清直早世幼
輿方雅有醞藉通班漢左清道丘曹真卿早孤蒙伯兄
允南親自教誨舉進士歷校書制舉醴泉尉陟清白長
安尉三院御史四為大夫六為尚書再為採訪節度充
禮儀使光祿大夫魯郡公允藏敦質孝悌有吏能制舉

延昌令監察充朔方衣資使殿中三為侍御史中允江陵少尹荆南行軍濠州及君孫泉明佐父開土門彭州司馬威明邛州司馬李明子幹沛詡頗誕及外孫博野尉沈盈盧遜並為逆胡所害各蒙贈五品京官濬好屬文翹華正頤慈明都水使者頗好五言校書題仁孝方正明經大理司直嶺南營田判官執喪九日不食頤河陽尉顥鳳翔參軍頗工小楷洗馬頤恭仁奉禮郎並早喪逝絃方義主簿泉明覲並沒蠻襲明徵明德明未仕

通明獲嘉尉將明昌明尉克明崇文明經衛密標榜之
颺有德行文詞華原主簿準漂水尉覲頗工文襄陽尉
覲有文行弘文進士顯仁友清白常熟令封金鄉男穎
清介勤學侍郎蔣列賞其判京兆兵曹襲金鄉男岫仁
純常熟主簿任城男頤浚儀尉頌清源尉頂幹辦揚府
法曹願長厚清白朝邑尉願左率倉曹碩秘書正字願
有史幹歙州錄事參軍曲阜男頤好為詩富陽尉願好
為文常州參軍並粗有所立君之諸祖諸父羣從揚庭

願並侍讀強學益期並學士中和至誠敬仲大智溫之
澂之澹之檣挺援撰溫泳陵並明經康成強學希莊日
損隱朝鄰幾知微舒說順勝式宣韶並進士制舉有意
中和趨庭希莊至刺史利仁明天文欣期元淑景靈並
校書光庭注後漢書嘉賓千里昇庠斥朝怡滔渾允濟
檣逸覲不器防有文詞博古少連恭敏博學行敬仲溫
之以孝聞潤有風義冕鱗邈迨以清白稱其餘咸著官
族不獲悉數洪惟累祖之耿光丕業有若子泉弘都之

德行巴陵記室之書翰特進黃門之文章秘監華州之
學識肇自魯國格於聖代紛綸盛美遂舉集於君君能
述遵前人不取失墜其事以忝聿脩宜其克饗尊榮為
清廟不祧之主真卿幸承遺訓叨受國恩既荷無彊之
休敢揚不朽之烈銘曰

系我宗邦顏公子封郎魯附庸亞孔聖浴沂風刺青徐
給事中護營柳渡江楓侍兄疾感蛇童鄰火斷珥貂重
施七葉傳孝恭武騎都尉司從便尺牘繼魚蟲慟君難

憤而終咨施室游湘東嗟禦正凜移忠衆黃門擅文雄
三韶長事東宮四穆叔史牢籠襄華州詁訓通小秘監
盛名鴻維少保文翰工莅畿赤五袞崇登望苑友桂叢
三超贈保儲躬流光盛廟貌融永不祧垂無窮

碑側記

建中元年歲次庚申秋七月癸亥朔鐫畢八月己未真
卿蒙恩遷太子少師冬十月壬子男頴封沂水縣男頌
新泰縣男姪男頂關一縣男頌字費縣男頌鄒縣男微軀官

階勲爵並至二品子姪八人受封無功而叨竊至此子孫敬之哉

碑額陰記

高祖記室君國初居此宅號州君舍人君侍馬堂今置廟地高祖妣殷夫人居十字街西北壁第一宅秘書監君禮部侍郎君侍馬號州君居後堂華州君於堂中生馬今充神厨少保君堂今充齋堂廳屋充亞獻終獻齋室

唐故杭州錢塘縣丞殷府君夫人顏氏碑銘

并序

第十三姪男金紫光祿大夫行湖州刺史上柱

國魯郡公真卿撰并書

君號

闕字

一定琅邪臨沂人北齊黃門侍郎之推府君之玄

闕字

皇朝秦王記室思魯府君之曾

闕字

著作郎弘文

集賢學士勤禮府君之孫

闕字

天皇曹王侍讀贈華州

刺史昭甫府君

闕字

慧明達發乎天均孝仁敬讓迥出

人表精究

闕字

不備其在家也九族仰其壺儀其移天

也六姻

闕十三字

史太夫人殷氏以彤管之才膺大家之選

闕十

一字秘書監元孫府君太子少傅惟貞府君藐焉始孩

闕十

三字擅大名皆君力也叔父吏部郎中敬仲府君

闕五

君

闕三

宜芳令裴安期妻司

闕四

割耳

闕二

因獲減死

及誕男

闕一

生而左耳缺焉君有三子長曰武康丞

闕一

紹

允工小

闕五

曰

利絕倫紹子壻郎中柳芳今之良

闕二

字

闕八

次曰處士齊望有成人之姿幼曰晉州長史

成已雅

闕七

陽

勇退不登

闕一

秩每與文士族祖濬武

平一呂因李暇陳

闕四

匡朝內弟曜卿允南姨弟劉瓘

族弟

闕一

同賦詩多擅警絕之句六女長適

闕二

生安陸

令銓孝養於君次適王元元著漢春秋次適蔡九言生

學

闕五

為當代之冠次適顏昭粹粹女適司勳郎

闕四

才器為海內

闕四

楊欽生灌季淮幼適我兄闕疑仁親

友

闕五

度為尼感殊

闕六

及女娉真卿童孺時特蒙君

教言辭音

闕四

延壽王孫賦

闕一

氏飛龍

闕二

淹造化篇

五都賦不幸開元廿五年秋七月有五日以隨牒終於

成已尉氏尉之公館享年八十四粵以明年春正月合

祔於東

闕一字

萬安山之王寶原禮也嗚呼君全德內充慈

仁外被才明可以升博士法

闕二字

以為母師雖偕老不

俱無石窳魚軒之貴長筵拜慶多鐫鳳乘龍之

闕三字

公

也真卿不敏夙承訓誨追深仁而莫逮謀不朽其庶茲

銘曰

闕四字

於惟我姑德

闕二字

撫愛深倫育耳割寬蘓惠

及疎賤仁涵朽枯子孫宴喜龍

闕二字

趨教我音辭王孫

五都期頤未究

闕三字

朱

闕一字

石墳阿聲流八區

周太師蜀國公尉遲迴神廟碑銘

天臨有周誕

闕一字

元輔屏內藩外經文緯武隱若城闕如

虓虎功

金

闕二字

聲

闕三字

蜀

闕一字

督

闕二字

茲天命

闕四字

姦

臣不祇憑陵文德暴夷京師

闕一字

我圖匡

闕廿一字

節

闕一字

誠

全死而不朽皇唐御歷景命有融賜金改葬懋烈昭忠鄴

有賢守是為張公

闕十字

宮閼宮有

闕一字

乃建豐碑豐碑有

崩袂薨遂止幽明戈色戡穀無虧享祀不忒

政和公主碑

肅宗女代宗母妹潼關失守輟夫柳渾乘以濟孀妹首
云平陽與孀子之軍於司竹裏城行匹庶之禮於宋公
字常紕匡復之師於武后皆前代所未有也

贈豪州刺史顏元孫墓誌

省試九河銘高松賦考劉奇劈曰銘賦音律既麗且新
時務五條辭高瞻理惜其貼經通六所以屈從常第葬
東京鵝店今作曜字

唐故太尉文貞宋公神道碑側記

初公任監察御史持服于沙河縣屬哭厥冠趙定州河朔兇懼邢州刺史黃文軌投艱於公公以父母之邦金革無避及賊至城下公為曉陳禍福其徒有素聞公威名者乃相率而去之開元末安西都護趙含章冒於貨賄多以金帛賂遺朝廷之士九品以上悉皆有名其後節度范陽事方發覺有司具以上聞玄宗切責名品將加黜削公一無所受乃進諫焉玄宗納之遂御花萼樓一切釋放舉朝皆謝公衣冠儼然獨立不拜翌日入奏

玄宗謂公曰古人以清白貽子孫乃卿一人而已公曰
含章之賄偶不至臣門非不受也玄宗深嘉歎之前碑
闕焉故略述於此公第三子渾之為中丞也方欲陳乞
御制碑頌未果而中受譴謫旋羯胡作亂事竟不成真
卿時忝監察殿中為中丞屬吏故公孫儼泣請真卿論
譔之昭義軍節度觀察使尚書左僕射兼御史大夫平
陽郡王薛公曰嵩以文武忠義之資為國保障上慕公
之德業歎尚無窮次嘉儼之懇誠崇賢莫致迺命屯田

郎中權邢州刺史封演購他山之石曳以百牛俾刻字
之工成乎半歲磨礱既畢建立斯崇遠近嗟稱古今榮
觀雖大賢為德樹善庸限於存亡而小子何知附驥託
跡於階序真卿刺湖州之日因成文請儼刻其側而志
之未及雕鐫而第六子衡謫居沙州參佐戎幕河隴失
守介於吐蕃以功累拜工部郎中兼御史河西節度行
軍司馬與節度周鼎保守燉煌僅十餘歲遂有中丞常
侍之拜恩命未達而吐蕃圍城兵盡矢窮為賊所陷吐

蕃素聞太尉名德曰唐天子我之舅也衡之父舅賢相也落魄如此豈可留乎遂贈以駝馬送還於朝大厯十二年十一月以二百騎盡室護歸士君子偉之乃古來所無也上欲特加超獎且命待之於側門十三年春三月吏部尚書顏真卿記

項王碑陰述

西楚霸王當秦之末與叔梁避讐

關一字

吳蓋今之湖州也

雖滅秦而宰制天下魂魄猶思樂茲邦至今廟食不絕

其神靈事跡具竟陵子陸羽所載圖經大厯七年真卿

蒙刺是州十二載姦臣伏法恩命追真卿上都闕二剋

期道路竟陵是諗予以故碑顛趾嘗因闕三已而復闕一

之真卿乃命再加崇樹闕五紀之時則仲夏方生明之

日

祭伯父豪州刺史文

維乾元元年歲次戊戌十月庚子廿一日庚申第十三
姪男銀青光祿大夫使持節饒州諸軍事饒州刺史上

輕車都尉丹陽縣開國侯真卿敢昭告於亡伯故朝議大夫豪州刺史府君之靈日者羯胡祿山俶擾河洛生靈塗炭兵甲靡夷二兄杲卿任常山郡太守忠義憤發首開土門擒斬逆豎挫其凶慝先蓋授衛尉卿兼御史中丞城孤援絕身陷賊庭聖朝哀榮褒贈太子太保甥姪八人李明盧逖等被賊害者亦贈五品京官嫂及兒女皆被拘囚睿略昭宣宇宙清廓脫於賊手並得歸京真卿比在平原遭罹凶逆與杲卿同心協德亦著微誠

二聖憫焉授戶部侍郎河北採訪招討使又遷工部憲
部二尚書再兼御史大夫出為同蒲饒三州刺史聖恩
錫類大門贈華州刺史兄弟兒姪盡蒙國恩允南授膳
部郎中允臧授侍御史威明試太僕丞頴授太子洗馬
頂授協律郎頴授秘書省校書郎賜緋魚袋泉明顯頴
穎等並蒙遷改一門之內生死哀榮真卿時赴饒州至
東京得申拜掃又方遠辭違伏增感咽謹以清酌庶羞
之奠以伯母河南縣君元氏配尚饗

與李太保帖

辭後明日至宅奉送承已當時出

闕六字

不獲重捧袂至

今為恨仲春漸暄不審太保尊體何如真卿粗爾不審
初到如何佇承異績以慰瞻仰因中郎張澈往謹附狀
不宣謹狀二月十四日刑部尚書顏真卿狀上李太保
大夫公閣下 張澈昨艱難時首末得力願在麾下有
容足處之幸甚謹空

奏事官至蒙問增慰馳誠冬閏初寒伏惟太保尊體安

適真卿悲疾何言蕃寇推退為憲之功忝沐深情俱增
喜躍前後不逢之信遂闕修狀何時入奏未間悲係無
喻謹還狀不次謹狀閏月十有四日刑部尚書顏真卿
狀上李太保大夫公閣下謹空

真卿粗自奉別渴仰何勝昨緣馬奔遂失馳謁想蒙情
恕也真卿十五日離家大小俱安沈沈病瘡少愈勿憂
為佳正遠披承益期自愛謹勒參候不次刑部尚書顏
真卿頓首李太保大夫公閣下

千手贊已領訖然尚少第二隔恐在書府希更根尋足
疎拙抵罪聖慈含弘猶佐列藩不遠伊邇省躬荷德恩
貸實深兢慄之誠在物何喻仲春暄甚不審太保尊體
何如所苦當轉勝也真卿緣驛上無馬私乘泡轉幾死
前進不得今日始至藍田即便取路不獲執別此情如
何珍重珍重謹附狀不次謹狀二月十一日陝州別駕
顏真卿狀上李太保大夫公閣下

與澄師帖

真卿承聞大華嚴會已遂園成取來日要詣彼隨喜如
何如何幸周副老草不悉真卿頓首和南澄師大德侍
者 十日謹空

與御史帖

真卿謹別上書於御史閣下竊聞尊候平和真卿瞻仰
瞻仰前所會廟上諸公未悟唯御史論高百僚振古未
有雜事可置況朝廷自有次序不足念乎真卿

守政帖

政可守不可不守吾去歲中言事得罪又不能逆道苟時為千古罪人也雖貶居遠方終身不耻緒汝等當須會吾之志不可不守也

廣平帖

得示問廣平碑本了來數日故當封呈真卿頓首

修書帖

賊軍未平使僕不憤見故先修書但召諸子弟與語不具真卿

中夏帖

真卿頓首中夏以還暑氣日甚病懶益不喜所為前欲
書石當須稍涼作之也幸不以差緩過之京人來何消
息嘉否

丈殊帖

近作一文殊師利菩薩碑但欲發揚主上聖意蓋不近
文律耳今奉呈充蓋醬之用可乎真卿白

訊後帖

真卿具前楮訊後所苦何如立斯極位雄廷江上佳山
秀水在公庭戶想日有樂事甚得佳士相延公高才逸
韻自有晉宋間人風坐此肆局不易處上方招致仁者
如公之豈久在江左乎行聞迅召以快士議真卿頓首

移蔡帖

貞元元年正月五日真卿自汝移蔡天也天之昭明其
可誣乎有唐之德則不朽耳十九日書

奉使蔡州書

真卿奉命來此事期未竟止緣忠勤無有旋意然中心
恨恨始終不改游於波濤宜得斯報千百年間察真卿
心者見此一事知我是行亦足達於時命耳

裴將軍詩

大君制六合猛將清九垓戰馬若龍虎騰陵何壯哉將
軍臨八荒烜赫耀英材劍舞若游電隨風縈且迴登高
望天山白雲正崔嵬入陣破驕虜威名雄震雷一射百
馬倒再射萬夫開匈奴不敢敵相呼歸去來功成報天

子可以畫麟臺

陶公栗里

張良思報韓龔勝耻事新徂擊苦不就含生悲拖紳嗚
呼陶淵明奕葉為晉臣自以公相後每懷宗國屯題詩
唐子歲自謂羲皇人手持山海經頭戴漉酒巾興與孤
雲遠辨隨還鳥泯

竹山聯句題潘書

竹山招隱處潘子讀書堂

真卿

萬卷皆成袞千竿不作

行處士陸羽練容飡沆瀣濯足詠滄浪前殿中侍御史廣漢李翬守道心

自樂下帷名益彰前梁縣尉河東裴修風來似秋興花發勝河陽

推官會稽康造支策曉雲近援琴春日長評事范陽湯清河水田聊學

稼野圃試條桑釋皎然巾折定因雨履穿寧為霜河南陸士修

解衣垂蕙帶拂席坐藜牀河南房夔檐宇馴輕翼簷裾染衆

芳顏粲草生還近砌藤長稍依牆顏顯魚樂憐清淺禽

閒意頡頏顏頊空園種桃李遠墅下牛羊京兆韋介讀易三

時罷園基百事忘洛陽丞趙郡李觀境幽神自王道在器猶藏

詹事司旦
河南房益

畫歆山僧茗宵傳野客觴

河東柳悵


遙峯對枕席

麗藻映縑緗

永穆丞顏峴

偶得幽棲地無心學鄭鄉

述上



顏魯公集卷十六